

मारवाड़ी तिमाई पत्रिका

अपोरो मारवाड़, अपोरी बोली
(जुलाई ऊं सितम्बर-2018)

लोकगीत

अंगुरा रो मेहल

बन्ना ओ अंगुरा रो मेहल चिणाय दो सा
कोई छाजा लगवाई दो दाड़म दाख रा सा। 2

बन्नी ए जुग में होवे सोई मांग लेजे ए
कोई छाजा नी लागे, दाड़म दाख रा बन्नी।

बन्न ओ धरती रो लैंगो सिलाय दो सा
कोई मगजी लगवाई दो चलती रेल री बन्ना। 2

बन्नी ए जुग में होवे सोई मांग लेजे ए
कोई मगजी नी लागे चलती रेल री बन्नी।

बन्ना ओ पवन रो कब्जो सिलाय दो सा
कोई बूटी जड़वाई दो सुरज चान्द री बन्ना। 2

बन्नी ए जुग में होवे सोई मांग लेजे ए
कोई बूटी नी लागे सुरज चान्द री बन्नी।

बन्ना ओ समदा में ढोलियो ढळवाई दो सा
कोई तकिया लगवाई दो मगरमंछ रा बन्ना। 2

बन्नी ए जुग में होवे सोई मांग लेजे ए
कोई तकिया नी लागे मगरमंछ रा बन्नी।



मुहावरा

1. भगोन रुप रंग को दियो नी, नी तो आबे रे ठीण्डा कर देतो।

अर्थ:-आप री तागत ऊं सलो घमण्ड करणो

2. कितोई करो कुत्ते री पूंछ तो ओटी र ओटी रेवे है।

अर्थ:-मुख ने भलेई कितोई समजाओ लखण नी आवे।

सुविचार

1. धन जद तोई सकरे कोम वास्ते नी लागे है, तो बुराई री जड़ बण जावे है- स्वामी विवेकानन्द

2. जिन्दगी लोम्बी नी पण महान होवणी जोईजे- भीमराव अम्बेडकर

भामासाह डिजिटल परिवार योजना

राज्य सरकार रास्ट्रिय खाद्य सुरक्षा अधिनियम (NFSA) मतलब के जिका परिवार ने रासन (गेहूँ) मिळे है, उओ ने सरकार फोन वे इंटरनेट रे वास्ते सरकार आर्थिक सुविधा देवे है। इणु राज्य रा जिका लोग हाल तोई डिजिटल सेवाओ रो लाभ नी ले पावता हॉं बे मिनक भी इणु डिजिटल में जुड़ जावेला। अर ए मिनक ई घरे बैठा आसानी ऊं आपरो सरकारी कोम करा पावेला।

भामासाह डिजिटल परिवार योजना कोई है?

रास्ट्रिय खाद्य सुरक्षा अधिनियम (NFSA) मतलब रासन रा हकदार परिवारो ने एक फोन वे इंटरनेट कनेक्शन रे वास्ते दो किस्तो में 500+500 रुपियो री सहायता देवे है।

योजना रो लाभ किकर लेवणो।

- 500 रुपियो री पेली किस्त राज्य सरकार आपो-आप लायक परिवार री भामासाह मुखिया (लुगाई) र बैंक खाते में जमा करा देवेला। इण वास्ते कोई फोरम भरण री जरूत नी है।
- सहायता री रकम बैंक खाते में आवण वास्ते आपरो खातो भामासाह कार्ड ऊं सही जुड़ियोडो हणो जोईजे है। जे थे कोई नवो खातो जोडावणो चाओ या जुड़ियोड के खाते में की फेरबदल करणो चावो हो तो ई-मितर माथे जा'न करा सको हो।
- जिला प्रसासन जगे-जगे माथे भामासाह डिजिटल योजना परिवार रे तेत केंप लगावेला थे इण केंपो या कोई दुकोन माथु आपरी पसन्द रो मोबाईल ले सको हो। इयो ई थे इंटरनेट वास्ते आपरी इच्छा अनुसार कोई कंपनी री सिम ले सको हो।

दुजी किस्त किकर लेवणी है?

- थे आपरे पुरोणे या नवे मोबाईल में राज्य सरकार री कोई भी एक अप्लीकेसन ई-मितर, भामासाह वॉलेट, राजस्थान सम्पर्क, राज मेल डाउनलोड करणी है। ईण सेगो में मोबाईल रजिस्टर (जोड़णो) करण री सुविधा उपलब्ध है। इण में थोरो मोबाईल रजिस्टर कर अन 500 रुपियो री दुजी किस्त थोरे खाते में जमा हो जाई है।
- आ जरूरी है के मोबाईल नम्बर आपरे परिवार रे किणी सदस्य रे नोम माथे होवणो जोईजे है।

भजन (अणद भयो आसा पूरी)

आसा पूरी अणद भयो, अब आणद आयो रे
भव पुरबले रा भाग, म्हाने सतगरु समजाया रे।
ग्यान गुणा री बाळद लाया 2, सतगरु आया रे
सुगरा नर समज गया भाई गाफल गोता खाया रे। 2...
अग्यानी ने सार समजावे सतगरु, सगुण नर समज पाया
सत सबदा रा मूंगा मोती, मे तो हिरदे पाया रे हे.....।
हिरा रा तो मेह बरे रे भाई 2, अग्यानी जीव तरसे रे
सतगरु जी म्हारा जाण लकावे, बे तो हिरदे भावे रे 2।
सतगरु सा जद मेहर करी, सार सबदा रा पाया रे
रामप्रकास जी अमर अवतारी, भक्त दीपाराम ने समजाया रे।
अणद भयो आसा पूरी अब आणद आयो रे.....



खेती-बाड़ी

थेपड़ियो ऊं बणायोडो स्वाद (ह्युमिक एसिड)

(पोधो ने बढावण री दवा)

थेपड़ियो ऊं बणीयोडी दवा पोधो रे वास्ते एक सकरो पोध बढावण री बढिया दवा है। इनो उपयोग ऊं ह्युमिक एसिड रे जियो इज परिणोम मिळे है। इनो प्रयोग छोटा छोटा पोधो री बडोदरी दर में वृध्दी रे वास्ते कियो जावे है।

दवा बणावण रे वास्ते सामग्री

25-30 थेपड़ियो या सुखोडा पोटा

50 लीटर रो ढोल

बणावण रो तरिको

एक 50 लीटर रे ढोल में दो साल पुरोणा छोणा या थेपड़ियो ने सावळ जमा दो। पछे उने उपर ताई पोणी ऊं भर दो। इने सात दिन तक पड़ियो रेवण दो।रोजिना एक दो बार ढोल ने हिला बोकर जो जिकेई ऊं पोणी में हलचल हो बोकरे (लकड़ी घाल अन नी हिलावणो है, ढोल ने पकड़ अन हिलावणो है)। सात दिनो पछे पोणी ढोल मू काढ अन नारो करलो। थेपड़ियो बारे काढ अन सुखो दो और बाळण में कौम ले सको हो। ढोल रे पोणी ने निथार ले।

उपयोग

जिको पोणी मिळियो है, बो पोधो रे बहवार रे वास्ते घणो उपयोगी है। इण पोणी ने तीन गुणा सादे पोणी में मिळान खड़ी फसल माथे छिड़काव कर सको हो। एक एकड़ री फसल वास्ते लगभग 40-50 थेपड़ियो ऊं बणियोडो 150 -200 लीटर दवा बण सके है। बडिया परिणोम वास्ते सात दिनो ऊं एकबार पाछो छिड़काव करणे ऊं बडिया परिणोम मिळे है।

भण्डारण व सावधानियाँ

बणावण रे एक महिने रे माई कोम में ले लेवणी जोईजे है।

कहानी (घर लुगाई रो राज)

एकर एक राजा घर में किनो राज चले मतलब के लुगाई री के मिनक री इण वास्ते एक सर्वे करायो। इण वास्ते घोसणा करी के जिके घर में लुगाई री चले बो तो सेव ले जाओ अन जिके रे घर में मिनक री चाले बो एक घोड़ो ले जाओ। मिनक दरबार में आवे अन एक एक कर अन सेव ले जावता हाँ। इयो करतो करतो दिन बधग्यो। जेड़े एक सेटो मिनक आयो उने मोटी मोटी मुछो, ओखियो राती होयोडी सरीर में हस्ट-पुस्ट जान राजा ने केयो राजा साब एक घोड़ो दो। राजा केयो बडिया टाळ न ले जा। बो घोड़ो ले अन घरे गियो। थोड़ी जेज ऊं बो मिनक पाछो आयो। आन राजा ने केयो राजा साब म्हारी लुगाई केयो के काळो रंग कोम रो को होवे है नी इण वास्ते मने तो धोळो घोड़ो दो। राजा केयो घोड़ो छोड दे अन सेव ले जा। रात रो टेम होगो। बारेह बजी अन के राजा रो मंत्री राजा रो आडो बजायो। राजा उठियो अन आडो खोलियो। राजा पुछियो मंत्री जी हमे किकर आया। मंत्री राजा ने पुछियो राजासाब इनोम रे माई थे सेव अन घोड़ो कियो राखियो की दुजो सोनो चोन्दी राखिया हाँ तो ले जावणीया ई सोरा होवता हाँ। जणे राजा केयो के मेतो सोनो चोन्दी राखता हाँ पण रोणी केयो के ए इज राखणा है इण वास्ते ए राखिया है। मंत्री जी राजाने केयो आपरे सेव में काट अन देऊ के साजी खाओ। राजा बात काट परी अन केयो के थे आ बात मने सुबे ई पुछ सकता हाँ हमे किकर पुछो। मंत्री केयो के म्हारी लुगाई केयो के थे राजासाब ने हमे पुछ अन आवो जणे में तो हमे आयो। राजा केयो मंत्री जी आपरे सेव घरे पुगाऊ के अटु ले लेओ हो।

कहावते

1. कळजुग आयो काळो धोळो घर में बड़गो ठेट, ब्रवो छोडिया घुंगटा काडण लागा जेट
कळजुग आयो काळो धोळो कळजुग चडगो चाळे, माँ-बाप री सेवा छोड दी घर में कुत्ता पाळे।
2. लोफर भलो नी, नीत निर्धन साळो, ठाकर भलो नी जार भलो नी चोर रुकाळो
खेत रुकाळी बाड़ करे बाड़ खेत ने खाय, राजा दण्डे खेत ने पछे पुकारण कटे जाई।

चुटकला

• एक मिनक रे हाथी बेचणो हो, पण हाथी बिकतो नी हो क्योकी हाथी रे माई एक खोड़ ही। जिके ऊ हाथी री पुरी किमत नी मिळती ही।

बोपारी- जोधपुर में हाथी बेचण ने आयो।

मिनक- हाती ने खरीदण रे वास्ते हाथी ने देखण लागा।

हाथी ने देखन, हाथी री बोली लगाई, हाथी री बोली लाख रुपियो तोई गी परी।

जेड़े अटिनु एक किसोन आयो, किसोन उबो रे परोन ध्योन ऊ हाथी ने देखण लागो।

बोपारी- सोचियो के ओ कोई जोणकार है, जे ओ किनेई के दियो के हाथी में कमी है, तो हाथी रो कोई एक रुपियो ई नी दे।

बोपारी- किसोन ने खने जा परोन केयो के पोच हाजर देऊ किनेई केजे मती

किसोन- मने भलेई दो हजार देजे पण आ तो बता के इनो मुण्डो कटे है।

• उन्दरा

एक दो उन्दरा दरखत माथे चडियोड़ा है।

अटिनु दरखत हेटे एक हाथी आयो, जेड़े एक उन्दरो हाथी माथे पड़ग्यो।

दुजोड़ा उन्दरो- दबान राख जावण मती देजे, में आऊ हूँ।

पेलोड़ा उन्दरो- अरे जावण दे, सारे मिनक कोई केई के दो जणा भेळा हुन एक ने मार दियो।

**में स्रेग जोणु आ स्रोच ई मिनक ने टोके रो डेडरो बणा देवे है- चाणक्य
थे दुनिया ने जिकी निजरो ऊ देखोला, दुनिया थोने एड़ीज लागेला- अम्यात**

सम्पर्क

तीसरी मंजिल, फ्लेट नम्बर तीन, गुलाब कोम्पलेक्स
सचिवाय हेण्डलूम के पास, तहसील रोड़ औसियाँ,

जोधपुर राजस्थान-342303

फोन नम्बर-02922-274014

Email- rajasthanlanguages@nirmaan.org.in

Web- www.nirmaan.org.in

बणावण आळा:-

गंगाराम अर रतन लाल योगी

मदत करणाळा:-

मुकेश कुमार योगी अर मारवाड़ी समुदाय